

Morning Dogri (NSD) National News Bulletin 29-03-2024

आकाशवाणी

1. भारत दे विदेश मंत्री होरें आकखेआ ऐ जे दिल्ली दे मुख्यमंत्री अरविंद केजरीवाल हुंदी गिरफ्तारी पर अमरीका दी टिप्पणी ठीक नेई ऐ।
2. लोकसभा चुनाव दे दुए गेड़ लेई अधिसूचना जारी। 12 राज्यें च 88 सीटें पर चुनाव होंगन।
3. उत्तर प्रदेश दे बांडा जिले च गैगिस्टर थमां राजनेता बने दे मुख्तार अंसारी दी दिलै दी घड़कन रूकने करी मौत होई।
4. राष्ट्रपति द्रौपदी मुर्मू होरें इस गल्लै पर जोर दिंदे होई आकखेआ जे बुनियादी ढांचे निर्माण प्रोजेक्टें गी जलवायु ते पर्यावरण मुआफक बनाना लोड़चदा।
5. भारतीय शटलर पी.वी.सिंधु मैड्रिड स्पेन मास्टर्स प्रतियोगिता दे महिला क्वार्टर फाइनल च पुज्जी गई ऐ।

<><><><><><><>

MEA Statement

भारत दे विदेश मंत्री डॉ. एस.जयशंकर होरें आकखेआ ऐ जे दिल्ली दे मुख्यमंत्री अरविंद केजरीवाल हुंदी गिरफ्तारी पर अमरीका दी टिप्पणी ठीक नेई ऐ। इक साप्ताहिक प्रेस वार्ता गी संबोधत करदे होई एमईए प्रवक्ता रंधीर जैसवाल होरें आकखेआ जे भारत दे इस सरबंध च अपनी सख्त आपत्ति जताई ऐ। उनें जोर देइयै आकखेआ जे अंतर्राष्ट्री सरबंधें दी नींह आपसी समझ ते सम्मान पर टिकनी जरूरी ऐ। सारे देशें गी दुए देशें दे अंदरूनी मामलें ते देश दी संप्रभुता दा सम्मान करना चाहिदा। अमरीका दे मिलर होरें केजरीवाल हुंदी गिरफ्तारी ते कांग्रेस दे बैंक खाते फ्रीज करने पर टिप्पणी कीती ही।

<><><><><><><>

Election Notification

लोकसभा चुनाव दे दुए गेड़ आस्तै कल अधिसूचना जारी कीती गई। इस गेड़ च 88 सीटें आस्तै 12 राज्यें ते 1 केन्द्र शासत प्रदेश च चुनाव होंगन। केरल दी 20 लोकसभा सीटां,

कर्नाटक दी 14, राजस्थान दी 13, महाराष्ट्र ते उत्तर प्रदेश दियां 8-8 सीटां, मध्यप्रदेश दियां 7, असम/बिहार दियां 5-5 सीटां, पच्छिम बंगाल ते छत्तीसगढ़ दियां 3-3 सीटां ते मणिपुर ते जम्मू कश्मीर च 1-1 सीटें आस्तै दुए गेड़ च वोट पोआए जांगन। नामांकन भरने दी तरीक 4 अप्रैल तोड़ी ऐ। इस गेड़ दे चुनाएं आस्तै वोट 26 अप्रैल गी पोआए जांगन। नामांकन पत्र दी जांच 5 अप्रैल गी कीती जाग जदके जम्मू कश्मीर च एह जांच 6 अप्रैल गी कीती जाग।

<><><><><><>

Lok Sabha

भारत निर्वाचन आयोग नै पच्छिम बंगाल च लोकसभा चुनाएं दे दुए गेड़ तैहत त्रै लोकसभा सीट पर 26 अप्रैल गी होने आले मतदान लेई कल अधिसूचना जारी करी दित्ती ऐ। दुए गेड़ तैहत नामांकन दाखल करने दी खीरी तरीक 4 अप्रैल ऐ। लोकसभा चुनां दे दुए गेड़ च राज्य दी दार्जिलिंग, रायगंज ते बालुरघाट लोकसभा पर मतदान होग। इस गेड़ च चुनां लड़ने आले प्रमुख मेदवारें च भाजपा दे प्रदेश अध्यक्ष ते बालुरधार थमां विधायक सुकांत मजूमदार दा मकाबला तृणमूल कांग्रेस दे विप्लव मित्रा कन्नै होग। तृणमूल नै दार्जिलिंग सीट थमां गोपाल लामा गी भाजपा दे विधायक राजू बिष्ट दे खलाफ मेदवार बनाया ऐ। करसियांग थमां भाजपा दे विधायक विष्णु प्रसाद शर्मा होरें घोषणा कीती ऐ जे ओह दार्जिलिंग सीट थमां पार्टी दे अधिकारिक मेदवार दे खलाफ स्वतंत्र मेदवार दे रूपै च चुनां लड़ंगन।

<><><><><><>

Jailed Mukhtar Ansari

गैगेस्टर थमां राजनेता बनी गेदे ते जेल च बंद मुख्तार अंसारी दी कल रातीं उत्तर प्रदेश दे बंदा मैडिकल कालेज अस्पताल च दिलै दी घड़कन रूकी जाने करी मौत होई गई ऐ। जिला जेल दे अंदर बेहोश होने पर ओहदी हालत कथित तौर पर बिगड़ने दे बाद कल उनेंगी अस्पताल च भर्ती कीता गेआ हा।

<><><><><><>

No Charge Interest Rate

निक्की बचत योजनाएं दी ब्याज दर च कोई बदलाव नेई कीता जाग। सरकार नै अगले त्रै महीने दी ब्याज दर च कोइ बदलाव नेइ आंदा ऐ। एहदा मतलब ऐ जे निवेशकें गी जनवरी

थमां मार्च दा गै ब्याज थ्होग। वित्त मंत्रालय नै अधिसूचना च आक्खेआ जे सुकन्या समृद्धि च 82 फीसदी, पीपीएफ च 7.1 फीसद ते डाक खाना बचत जमा उप्पर 4 फीसद ब्याज थ्होआ करदा ऐ।

<><><><><><>

President Murmu

राष्ट्रपति द्रौपदी मुर्मू होरें जोर देइयै आक्खेआ ऐ जे निर्माण परियोजना ते आधारभूत ढांचे बनाने दे कम्म च पर्यावरण ते ऊर्जा दे संरक्षण पर अधारित होने चाहिदे। राष्ट्रपति भवन च सीपीडब्ल्यूडी दे कार्यकारी इंजीनियरें गी संबोधत करदे होई उनें आक्खेआ जे इमारतां, शिडकां ते दुए निर्माण कम्में च ऊर्जा ते पर्यावरण दे बचाह पर ध्यान देना लोडचदा ऐ। उनें आक्खेआ जे इंजीनियरें गी नमीं सोच अपनां दे होई कम्म करना चाहिदा जेह्दे कन्नै ओह नमीं चुनौतिएं कन्नै असानी कन्नै निबड़ी सकन।

<><><><><><>

PM Modi

प्रधानमंत्री नरेन्द्र मोदी होरें कांग्रेस गी दुएं पर आरोप लाने आस्तै आड़े हत्थें च लैता। इक सोशल मीडिया पोस्ट च प्रधानमंत्री होरें आक्खेआ जे 5 दहाकें पैहले कांग्रेस नै प्रतिबद्ध न्याय पालिका दी मंग कीती ही। उनें आक्खेआ जे कांग्रेस दुएं शा प्रतिबद्धता चाह्दी ऐ तां जे ओ अपना स्वार्थ पूरा करी सकै। एह्दे च कोई हरानगी नेई ऐ जे 140 करोड़ भारतीय कांग्रेस गी नकारी दित्ता ऐ। तोआई कांग्रेस प्रधान मल्लिका अर्जुन खडगे होरें आक्खेआ ऐ जे प्रधानमंत्री हुंदा देश दी न्याय पालिका पर ब्यान देना सेइ नेइ ऐ। उनें आक्खेआ जे भारतीय संस्थान भारती लोकें दी अमानत ऐ ते कांग्रेस पार्टी नै इनें संस्थाने गी बनाने ते मजबूत करने आस्तै योगदान दित्ता ऐ।

<><><><><><>

India-China

पूर्वी लद्दाख च असल कब्जा रेखा उप्पर 4 ब'रे शा जारी सीमा विवाद दे बश्कार भारत ते चीन दे शीर्ष राजनसिकें दी 29में दौरे दी बैठक होई जेह्दे च लगातार संपर्क बनाए रखने पर सैहमति बनी, पर कुसै चाल्ली दी सफलता हासल नेइ होई। दौनें पक्खें स्वीकार कीता ऐ

जे मजूदा दपक्खी समझोतें ते प्रोटोकॉल दे मताबक सीमावर्ती क्षेत्रें च शांति बनाइयै रखना जरूरी ऐ।

<><><><><><>

Rajnath

अग्निवीर स्कीम गी लेइयै रक्षा मंत्री राजनाथ सिंह होरें बड्डा ब्यान दिंदे होई आक्खेआ ऐ जेकर लोड पेई तां सरकार अग्निवीर भर्ती स्कीम च बदलाव लेई तैआर ऐ। इक निजी टीवी चैनल कन्नै गल्लबात करदे होई आक्खेआ जे सरकार एह जकीनी बनाना चांह्दी ऐ जे अग्निवीरें दा भविक्ख सुरक्षत रवै। उनें अगुँ आक्खेआ जे रक्षा बलें च युवा अवस्था लाजमी ऐ, मिगी बझोंदा ऐ जे युवा मते उत्साही न ते मते तकनीक प्रेमी न। असें गी इस गल्लै दा ध्यान रक्खेआ ऐ जे उंदा भविक्ख बी सुरक्षत ऐ। जरूरत पेइ तां इस स्कीम च बदलाव बी करगंन। केन्द्र सरकार नै 14 जून 2022 गी युवाएं लेई सशक्त बलें च सेवा भर्ती अग्निवीर योजना शुरू कीती ही। एह योजना देशभक्त ते प्रेरित युवाएं गी चऊं ब'रें दी अवधि लेई सशक्त बलें च सेवा करने दा मौका प्रदान करदी ऐं हालांके मजूदा समें च चऊं ब'रें दे मगरा बैच दे सिर्फ 25 फीसदी युवाएं गी गै 15 ब'रे दी अवधि लेई उंदी सरबंधत सेवाएं च वापस भर्ती कीते जाने दा प्रावधान ऐ।

<><><><><><>

Sita Ram

सीता राम मीणा होरें गी नाइजर गणराज्य च भारत दे अगले राजदूत दे तौरा पर नियुक्त कीता गेआ ऐ, मजूदा समें च ओह विदेश मंत्रालय च निदेशक न। विदेश मंत्रालय नै जारी इक ब्यान च एह जानकारी दित्ती। इत्थें एह गल्ल ध्यान आनने जोग ऐ जे नाइजर इक जिमीं कन्नै घिरे दा मुख् ऐ। जिस दी सीमा पच्छम अफ्रीका दे सहारा-साहेल क्षेत्र दे 7 होर दुए मुख् कन्ने लगदी ऐ। एह इक घोषत धर्मनिरपेक्ष राज्य ऐ। नाइजर च यूरेनियम, सोना, फास्फेट, लिथियम, तेल ते गैस जनेह खनिज संसाधन न।

<><><><><><>

IPL

आईपीएल क्रिकेट च राजस्थान रॉयल नै कल रातीं जयपुर दे स्वाई मान सिंह स्टेडियम च दिल्ली कैपिटल्स गी 12एं रंजें कन्नै हराया। राजस्थान रॉयल नै 20एं ओवरें च 185 रंज बनाए। दिल्ली कैपिटल्स शडे 173 रंज गै बनाई सकी। बैंगलुरु दे एम.चिन्ना स्वामी स्टेडियम च रॉयल चैलेजर्स बैंगलोर दा मकाबला कोलकाता नाईट राईडर्स कन्नै होग। मैच संजा साढे 7 बजे शुरू होग।

<><><><><><>

Badminton

बैडमिंटन च भारत दी पी.वी.सिंधु होरें मैड्रिड स्पेन मास्टर्स प्रतियोगिता दे महिला एकल क्वार्टर फाइनल च थाहर बनाई लैती ऐ। सिंधु होरें चीनी खडारी गी 21-14, 21-12 कन्नै हराया। सिंधु दा थाईलैंड दी खडारी कन्ने अज्ज क्वार्टर फाइनल मकाबले च आमना-सामना होग।

<><><><><><>